

ԳՐԱԽՈՍՈՒԹՅՈՒՆ

Էդուարդ Մկրտչյան, «Գրաբարի դասընթաց», Երևան, 2008 թ., 300 էջ:

Վերջերս լույս է տեսել Է. Ս. Մկրտչյանի «Գրաբարի դասընթաց» ուսումնա-
օժանդակ ձեռնարկը, որի պատասխանատու խմբագիրն է դոցենտ Դ. Ս. Ավե-
տիսյանը, երաշխավորել է Խ. Աբովյանի անվան պետական մանկավարժա-
կան համալսարանի հայոց լեզվի և նրա դասավանդման մեթոդիկայի ամբիո-
նը, ինչպես նաև պրոֆեսոր Ռ. Ս. Ղազարյանը:

Այս բնագավառում հայտնի են Մ. Աբեղյանի, Ստ. Մալխասյանցի, Զր. Աճառ-
յանի, Ս. Ղազարյանի, Վ. Առաքելյանի, Ա. Արրահամյանի, Պ. Շարաբխանյանի,
Դ. Ավետիսյանի և Ռ. Ղազարյանի հեղինակած աշխատությունները: Վերջերս
լույս տեսան Վ. Համբարձումյանի, նաև Լ. Խաչատրյանի և Գ. Թոսունյանի ձեռ-
նարկները:

Է. Ս. Մկրտչյանի դասընթացի հենքն է կազմում երեսունչորս դասերից բաղ-
կացած նյութն իր գործնական մասով՝ առաջադրանքներով ու վարժություննե-
րով, բնագրային թարգմանական հաղվածներն ու գրաբարյան հայերեն – աշ-
խարհաբար համառոտ բառարանը: Դասերը ներկայացված են երեք մասով:
Առաջին դասը նվիրված է գրաբարի հնչյունաբանությանը:

Երկրորդ մասում մինչև քսաներկուերորդ դասը քննարկվում են հին հայե-
րենի ձևաբանական երևույթները:

Ձեռնարկի քսաներեքից երեսունչորսերորդ դասերը նվիրված են գրաբարի
շարահյուսական հիմնահարցերի պարզաբանմանը և ուսուցմանը: Քննության
են առնվում հին հայերենի ինչպես պարզ նախադասության կազմության ու
գործառության, այնպես էլ բարդ նախադասության էության ու տարատեսակ-
ների տեսական բնորոշման հիմնահարցերը: Ինչպես արդեն նշեցինք, այս դա-
սընթացը տեսական կտրվածքով մյուսներից շահեկանորեն առանձնանում է
հենց շարահյուսական հարցերի համակարգված ու քիչ թե շատ ամբողջական
քննարկման իրողությամբ: Է. Մկրտչյանը առանձին դասեր է հատկացրել գրա-
բարի շարահյուսական այնպիսի երևույթների հանգամանալից պարզաբան-
մանը, ինչպիսիք են նախադասության ենթակայի ու ստորոգյալի արտահայ-
տությունը, նրանց համաձայնությունն ու խնդրառությունը, որոշիչ–որոշյալ,
հատկացուցիչ–հատկացյալ, բացահայտիչ–բացահայտյալ կապակցություն-
ները, խնդիրներն ու պարագաները, համադասական ու ստորադասական և
բազմաբարդ նախադասությունները և այլն: Տեսական նյութն ամրապնդվում է
վարպետորեն կազմված առաջադրանքներով ու վարժություններով, որոնց
օգնությամբ ուսանողը ոչ միայն ավելի լավ է ընկալում ներկայացվող տեսա-
կան նյութը, այլև ամրապնդում է ձեռք բերված լեզվաբանական գիտելիքները
ինքնուրույն աշխատանքի օգնությամբ: Պետք է հատուկ ընդգծել նաև այն
հանգամանքը, որ «**ի տարբերություն գրաբարի հայտնի դասագրքերի ու**

ձեռնարկների՝ այստեղ տրված վարժություններում բնագրային նյութերը, նախադասությունները թարգմանված-վերածված են արևելահայերենի՝ նպատակ ունենալով բնագիրը՝ գրաբարյան խոսքը, հասկանալի և մատչելի եղանակով ուսուցանել» (էջ 3-4):

Դասընթացի վերջում տեղ են գտել հիմնականում հինգերորդ դարի հայ մատենագիրների երկերից խնամքով քաղված բնագրային թարգմանական նմուշները, որոնք նույնպես ուղեկցվում են մանրամասն ծանոթագրություններով ու բոլոր դժվարըմբռնելի կառույցների պարտադիր աշխարհաբար թարգմանությամբ: Այս ամենի արդյունքում թվում է, որ սույն դասընթացը կարող է օգնել ուսանողին, ընթերցողին՝ հաղթահարելու մետրոպոլիտ հայերենի լեզվական զանծերին ամնիջականորեն հաղորդակցվելու գործընթացում առաջ եկող դժվարությունները:

Ուսումնական ձեռնարկում, ցավոք, կան տպագրական վրիպումներ (էջ 3, 4, 41, 50, 86, 92, 245) ու խմբագրական բնույթի սայթաքումներ, որոնք որակ չեն կազմում և հեշտությամբ կվերացվեն գրքի հետագա հրատարակություններում: Կարծում ենք, հեղինակն ի գորու է ավելի հարստացնելու գրաբարի լեզվական կառուցվածքի ուսումնական շարադրանքը տեսական նոր պարզաբանումներով ու գործնական ավելի հղկված առաջադրանքներով, որոնց մեծ անտարակույս դեռ ականատես կլինենք:

Ընդհանուր առմամբ գրախոսվող «Գրաբարի դասընթացը» գրված է գիտական պատշաճ մակարդակով, գրաբարի բուհական դասավանդման համար կրթա-մանկավարժական զգալի ներուժ է պարունակում և, անշուշտ, կարող է օգտակար լինել հին հայերենով հետաքրքրվող ինչպես մասնագետների ու ուսանողների, այնպես էլ ընթերցող ամենալայն շրջանակների համար:

Թ. Ս. Շահվերդյան
բանասիրական գիտությունների դոկտոր